

Kalaallit Nunaanni politimesteri nunap ilaani aalajangersimasuni immikkut akuersissuteqartarsinnaanera periarfissaqartillugu nunami maani inunnik angallassitutini biilini assakaasut quaannaveeqqutillit atoqqusaajunnaarnissaat siunertaralugu naalagaaffeqatigiinni oqartussaaffinnut saaffiginneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Steen Lynge, Demokraatit)

Akissuteqaat

(Ineqarnermut Attaveqatigiinnermullu Naalakkersuisoq)

Aappassaanneerpeqarnera

Naalakkersuisut sinnerlugit Inatsisilerinermut Ataatsimiititaliaq Inatsisartut aalajangiiffigisassaattut siunnersuut pillugu isumaliutissiisummik suliaqarnermini peqqissaarussilluni sulisimaneranut qutsavigaara.

Naalakkersuisut allanguutissatut siunnersuutaannut ataatsimiititaliaq tapersiisoq, Naalakkersuisut iluarisimaarlugu maluginiarpaat.

Angallannermut maleruagassat angallannermi isumannaassuseq innuttaasullu peqqissusaat eqqarsaatigalugit ilusilerneqarsimanerat Naalakkersuisunit pingaartinneqarpoq. Taamaattumik Naalakkersuisut angallannermi isumannaallisaanermut sunniuteqanngitsumik aqqusinernik nungullartitsisarnermik silaannarmillu mingutsitsisarnermik annikillititsinissamut periarfissanik misissuinissaq siunertaralugu naalagaaffeqatigiinni oqartussaaffinnut saaffigininnissaannut Inatsisartut tapersersuinerat Naalakkersuisuniit iluarisimaarneqarpoq.

Taamatut oqaaseqarlunga siunnersuut Inatsisartuni suliassanngorlugu tunniuppara.